

## **L'emprima canorta rumantscha ordaifer il Grischun avra sias portas ils 2 da matg 2016 a Turitg**

Turitg, ils 27 d'avrigl 2016

L'uniun Canorta Rumantscha Turitg e la Fundaziun GFZ (anteriuramain Gemeinnütziger Frauenverein Zürich) avran cuminaivlamain ils 2 da matg l'emprima canorta rumantscha a Turitg.

La purschida sa drizza a famiglias che vulan pussibilitar a lur uffants d'emprender e da discurren rumantsch er ordaifer l'ambient famigliar. La purschida da partenza sa cumpona d'in di rumantsch ad emna (mintgamai il glindesdi da las 07.30 – 18.00) e po vegnir amplifitgada en il decurs dal temp e tenor basegn sin dus u plirs dis ad emna. A disposiziun stattan 12,5 plazzas, da quellas maximalmain trais per poppins (tranter 3 e 18 mais). La gruppa cun uffants da differenta vegliadetgna vegn tgirada da persunal spezialisà rumantsch. La canorta d'uffants pitschens sa chatta en il center per famiglias Zeltweg da la Fundaziun GFZ (Zeltweg 21b, 8032 Turitg), betg lunsch davent da la staziun Stadelhofen.

Il temp dal matg enfin la fin da fanadur 2016 vala sco fasa da pilot. Collavuraturas e collavuratur vegnan ad introducir ils emprims uffants ed a crear il mintgadi da canorta cun promover il rumantsch. Il medem mument vali da segirar la finanziaziun da la purschida. A partir dal 1. d'avust 2016 cumenza il manaschi ordinari. Tenor dumondas da geniturs d'enfin ussa vegn la purschida dad in di da la Canorta Rumantscha ad esser occupada gia avant la fin dal 2016.

Suenter che ha cumenzà il manaschi ordinari planiseschan ils manaders da far in di da las portas avertas per las medias ed il public interessà. Ulteriuras infurmaziuns suondan a temp inditgà.

### **L'uniun Canorta Rumantscha Turitg (CRT)**

L'uniun cun sedia a Turitg ha l'intent da porscher ad uffants en la regiun da Turitg ina tgira complementara a la famiglia adattada a la vegliadetgna e che correspunda al svilup e quai en rumantsch. Ella è averta per tut ils idioms rumantschs. L'uniun po manar ina canorta d'uffants pitschens rumantscha. Sco alternativa èsi era pussaivel da sa colliar resp. da s'integrar en ina canorta d'uffants pitschens gia existenta en la regiun da Turitg. Actualmain èn var ventg famiglias commembras da l'uniun CRT. L'uniun è vegnida fundada l'atun 2015 da tschintg babs rumantschs che fan actualmain tuts part da la suprastanza da l'uniun.

### **Fundaziun GFZ**

L'intent da la Fundaziun GFZ sa cloma: «La fundaziun è in'organisaziun d'utilitad publica, religiusamain e politicamain independenta, che ha l'intent da crear e da manar tenor basegns socials purschidas per famiglias sco era da promover il svilup ed ils spazis libers d'uffants, da giuvenils, da famiglias e da dunnas.»

La Fundaziun GFZ (anteriuramain Gemeinnütziger Frauenverein Zürich) s'engascha dapi il

1885 per ils basegns da dunnas, d'uffants e da famiglias e tgira passa 1000 uffants en 13 canortas d'uffants pitschens ed en famiglias dal di e maina plinavant centers da famiglia en la citad da Turitg. Ella è in'organisaziun da non-profit, confessiunalmain neutrala e politicamain independenta. La Fundaziun GFZ distgargia dunnas e famiglias, promova la furmaziun e la furmaziun supplementara da giuvenils e porscha pussaivladads d'abitar ad emprendists e students.

Ulteriuras infurmaziuns davart la Canorta Rumantscha Turitg chattais Vus sin la pagina d'internet [www.canortarumantscha.ch](http://www.canortarumantscha.ch). As annunziar pudais Vus sin [www.gfz-zh.ch](http://www.gfz-zh.ch).

Dumondas en connex cun la porschida pudais Vus gugent drizzar a las personas menziunadas sutvart.

Amiaivels salids

Uniun Canorta Rumantscha Turitg

Remo Pfister, president  
[remopfister@gmx.net](mailto:remopfister@gmx.net)

Fundaziun GFZ

Martin Käser, manader «Verbund 3» e  
responsabel per il project  
[m.kaeser@gfz-zh.ch](mailto:m.kaeser@gfz-zh.ch)